

AKASHVANI AIZAWL

REGIONAL NEWS BULLETIN

HEADLINES (EVENING)

- 1. Khamrang leh Buichali inkar kawngchhiaa a tangkhang lirthei zingah, tuialhthei phur oil tanker leh eirawngbawlna gas phur lirthei te chhuah hmasak an ni a, Aizawl-ah supply phurh thlen mek a ni.
- 2. Rural Development Minister Prof Lalnilawma chuan MGNREGA chu dik taka kalpui turin National Mobile Monitoring System hmangin hnathawkte leh hnathawh endik a ni tawh dawn a ti.
- 3. Vawiin khan Lok Sabha-ah Pahalgam-a firfiakte beihna chhanletna Operation Sindoor chungchang sawiho a ni.
- 4. Supreme Court chuan August ni 1 a Election COMmission-in Bihar draft electoral roll tlangzarh tum chu dan a tum lo.

<><><>

FOOD SUPPLY

Aizawl leh Silchar inkar kawngpui National Highway kawngchhiaa a tangkhang lirthei zingah, tuialhthei phur oil tanker leh eirawngbawlna gas phur lirthei te chhuah hmasak an ni a, tuialhthei leh eirawngbawlna gas te hi Aizawl-ah phurh thlen mek a ni.

Khamrang leh Buichali inkar kawng thawm that hna hi zawi zawia kalpui mek a ni a, kan corr thudawn danin hnathawh a chak hleithei lova, amaherawhchu lirthei tangkhang zingah nitin mamawh phur te chhuah hmasak tir dan ngaihtuah a ni.

Vawiina ZPM Party inkhawmah ZPM Legislature Party Secretary Pu TBC Lalvenchhunga helai kawngpui thawmthat dan chungchang hi sawiin NHIDCL mawhphurhna ni mah se lirthei te an lo din thup takah chuan a ram neitu an nih angin hma an la mek a ti a, ZPM Legislature Party Meeting kar kalta Inrinni zana thukhawm chuan kawng enkawltute hi hnamdang an nih avangin boulder lakna tur te an haihchham a; quarry kawng a lo chhe bawk nen, a hmun ngeia vilpui tha an ti tih sawiin, a tul chen chen MLA leh Minister ten ni tin an vil tawh dawn a ti a. Tun dinhmunah harsatna lian zual sut kian tawh a ni a, lirthei tangkhang pawh zanin lamah chuan a awm tawh lo tura ngaih a ni, a ti.

<><><>

WORLD HEPATITIS DAY

World Hepatitis Day pualin vawiin khan Aizawl Civil Hospital-ah hun hman a ni.

World Hepatitis Day hi Aizawl Civil Hospital Medicine OPD kawtah hman a ni a, National Virus Hepatitis Control Program Nodal Officer Dr. Lalrothuama chuan Hepatitis natna awmzia sawi fiahin he natna umbo beihpui hi kum 2019-ah Mizoram bikah neih tan a nih thu a sawi a, Hepatitis natna chu awm hona satliah-ah a inkai chhawn theih loh thu leh a veite pawh thin hrik mai lova tanpui zawk an tul thu a sawi a, hepatitis natna neiten anmahni enkawltu doctor-te thu an awih that a ngai tih sawiin a enkawl dan pawh a veite'n natna an neih dan a zir a an thensawm thin thu a sawi bawk.

Byte..... Dr. Lalrothuama....(20 seconds)

Aizawl Civil Hospital Senior Medical Superintendent Dr. Lalchhuankimi pawhin thusawiin hepatitis natna chu kum 2030-a umbo tum a nih thute, Hepatitis damdawi chu Mizoramah pawh District Hospital tinah a thlawh liau liaua a veite pek an nih thin thu te a sawi a, kum 2030-a khawvel huap a hepatitis umbo a nih theihna turin mi zawng zawng tawiawmna a pawimawh thu a sawi bawk.

Byte..... Dr. Lalchhuankimi....(22 seconds)

World Hepatitis pual hian Aizawl Civil Hospital chuan vawiina damlo inentir te tan a thlawhning thingpui in tur an buatsaih sak a ni.

<><><>

RD MINISTER

Rural Development Minister Prof Lalnilawma chuan, ni 100 inhlawhna MGNREGA chu dik taka kalpui turin National Mobile Monitoring System hmangin hnathawkte leh hnathawh endik a ni tawh dawn a ti.

He thu hi vawiina a pisa-a chanchinbu mite a kawmnaah sawiin, Minister chuan ni 100 inhlawhna hnuaia hnathawh tuten a tak taka hna an thawk tih lantirna, Mobile phone application National Mobile Monitoring System ti a a hming an vuah hmangin hnathawh tan tirh leh ban dawnah thlalak a ngaih tawh tur thu a sawi a, hnathawh tan tirh a thlalak a langte chu tlai lam hnathawh ban thlalak a an kim lo emaw a ngai vek an lang lo a nih chuan sorkar laipui dan thar zamin hnathawh lo ang a a lantir dawn thu a sawi a, hlawh pawh hetiang a nih chuan beisei tur a awm loh thu a sawi bawk. Hetianga sorkar laipuiin dan an rawn zam tak avang hian, minister chuan MGNREGA kaihnawih sorkar hnathawh leh a chhawrtu VC leh mipuite fimkhur leh uluk lehzuala kal tura a duh thu a sawi bawk.

Byte of RD Minister...(31 secs)

Prof Lalnilawma chuan Job Card hi chhungkaw khatah pakhat chauh neih phal a ni a ti a. Chhungkaw thuhmun atanga job card pakhat aia tam neih tum ten, Ration Card an thendarh tir thin tih te pawh hriat a ni a. Chhungkua, in danga cheng an nih loh chuan job card hi chhungkaw khat atangin pakhat zel bak a neih theih loh tih hriat nawn leh ni se a ti a ni.

Kumin sorkar tangka kum kal mekah sorkar laipua Rural Development ministry chuan ni 100 inhlawhna atan Mizoram sorkar chu cheng nuai sing 3 sang 5

za 3 sawmhnih paruk wage component atan a ruahman sak tawh thu leh, material component atan cheng nuai sang 2 za 2 leh pasarih an hmuh tawh thu a sawi bawk.

<><><>

MIZORAM BJP PREZ MET FM

Mizoram State BJP President, Dr K. Beichhua an vawiin khan Union Finance Minister Nirmala Sitharaman a hmu a, Mizoram harsatna leh mamawh hrang hrangte a thlen.

Union Finance Minister nen an inkawmnaah Dr K. Beichhua chuan tun dinhmun Mizoramin chhan hrang hrang avanga harsatna a tawh mekte leh sum lama harsatna a neihte chu lo zirchiansak tur leh, tanpuina awm theite a kawng lo dap pui turin a ngen a ni.

Union Finance Minister chuan an thil thlente chu lo enzuisk a tum thu sawiin, remchang hmasa berah Mizoram rawn tlawh a tum thu Dr. K Beichhua hnenah hian a lo sawi a, Delhi a cham mek, Mizoram BJP President chuan zanin hian Union Minister dangte pawh dawr chhonzawm zel a tum bawk.

<><><>

MNF PR

MNF Senior Vice President, Dr.R.Lalthanglianan kumin hi sorkarin sum a puk tam ber kum a ni a, GSDP percent atanga chhut pawhin Mizoram leiba san ber kum a ni, a ti.

Vawiina Aizawl-a MNF Party Office Mizo Hnam Run inkhawmah he thu hi sawiin Dr Lalthangliana chuan, ZPM sorkarin kum 2024-2025 chung kha inrenchem kumah puang mahse; Mizoramin leiba cheng vaibelchhe 3130 vel a neih belh tih Comptroller and Auditor General of India (CAG) report-ah tarlan a ni a ti a, Mizoram sorkar chuan Covid an tawrh nasat ber kum pawh khan cheng vbc.1800 chauh a puk a ni a ti.

Dr.R.Lalthangliana chuan Union Finance Minister thusawi sawichhawngin, GST hniam reng reng chu Finance Commission atangin sum an dawng tha thei ngai lo a ti a, tuna GST tlahniam ta em em hi restricted tender leh departmental-a contract hna inpek a nasat vang pawh a ni thei a ti.

Kum 2017-18, GST dan hmanga chhiah lak anih tanga a vawi khat nan kum 2024-25 ah Mizoram GST lakkhawm a tlahniam duai a, Covid hunlai pawha la thleng ngai lo a ni a ti a. Kum tharah pawh ziaawm lam aiin a hniam zawngin a kal chhonzawm zel a. Tual chhungah pawisa a vang a, sumdawngten inhralh harsa an ti deuh vek a. A chhan ni ta ber chu budget figure atanga enin ZPM sorkar hi Finance enkawlah a hlawhchham vang a ni a ti.

<><><>

AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni.

Naktuk zing dar 7 leh a chanve-ah Chanchinthar puan leh a ni ang.

<><><>

OPERATION SINDOOR

Vawiin khan Lok Sabha-ah Pahalgam-a firfiakte beihna chhanletna Operation Sindoor chungchang sawiho a ni a. Defence Minister Rajnath Singh-a chuan Operation Sindoor chu sipaite hmalakna chauh nilovin India thuneihna, a nihna leh firfiakte laka a policy sawrkarin a tihhlawhtlin zia tilangtu a ni a ti a. Jammu & Kashmir-a firfiakten Pahalgam an beih hnuah India chuan tum fel tak neiin Operation Sindoor a kalpui tih sawiin sipaiten firfiakte inkulhna hmun kua an kapchhia a ti a. Firfiak 100 chaung an thih bakah anmahni chhertute leh lo puitute pawh thah an ni a, a tam zawk chu Jaish-e-Mohamme, Lashkar-e-Taiba leh Hizbul Mujahideen firfiak pawl ami an nih thu a sawi.

<><><>

SUPREME COURT

Supreme Court chuan August ni 1 a Election COMmission-in Bihar draft electoral roll tlangzarh tum chu dan a tum lo. Bihar-ah hian Special Intensive Revision neih niin August ni 1 ah draft electoral roll hi tlangzarh tura ruahman a ni a.

Vawiin khan Supreme Court chuan Election Commission in Bihar Special Intensive Revision (SIR) a kalpui khinna thubuai hi ngaihtuah a. Justice Surya Kant leh Joymalya Bagchi te thutna bench chuan he thubuai hi a ngaihtuah a. Election Commission khingtute Special Intensive Revision avang hian kum 2025 Bihar Assembly inthlanah voter tam tak paih an nih pah dawn an sawi a. Hetihlai hian Election Commission chuan voter list diktak neih an tum thu an sawi thung a ni.

<><><>

TERRORISTS KILLED

Vawiin khan sipaiten Sirnagar-a Harwan ah firfiak pathum an kaphlum. Sipate chuan heng firfiak kahhlumte hi Pahalgam-a Baisaran thingtlang khuuaa firfiakte chetnaah khan an inhnamhnawih tih an sawi a. Sipate hian firfiakte dapchhuah hna hi an thawk chhunzawm mek a ni.

<><><>